

## REGIONAL NEWS

RAIN HAVOC

Nimin atanga ruahpui leh thli tleh avangin hmun hrang hrangah chhiatna thleng a awm a, hriat theih chinah heng chhiatna avang hian mi pakhatin nunna a chan.

Nimin atanga thli leh ruah tla hian Mizoram hmun hrang hrangah chhiatna thlenin hriat theih chinah Aizawl District ah leimin hmun hrang hrangah a awm a, tukin khan Thuampui venga lungremin mi 2 a delh a, mi pakhatin nunna chanin ruang hi chawhma dar 10 vel khan lakchhuah a ni a, thudawn danin nunna chan hi Lalnunmawia (kum 37), Tlungvel khua niin Thuampui ah thlahna hun hman anih hnuah a ruang hi a nutei te awmna Chawnpui veng pan pui a ni. Thuampui lungrem chimin a delh zinga pakhat Lalfakzuala (kum 35) Ramthar Veng, Aizawl hi a kawng ruh a tliak nia thudawn a ni a, Greenwood Hospital ah admit a ni a, Lalnunmawia leh Lalfakzuala te hi pioneer in camp an hlui hlawn tawhah an riak a, tukin khan lung rem chimin an riah naah hian a delh a ni.

Zemabawk South Lungbial panna kawngpui Berawtlang pan chhohna kawngpui chu nasa takin a min a, thudawn danin helai kawng min avang hian thi leh hlaim erawh hriat tur an awmlo a, helai kawng hi a min tawh avangin lei dawh a ni a, tunhnaiah a thlang lama in hmun laih a nih avangin lei dawh chawpin a min leh ta a ni.

Aizawl Traffic Police thuneitute chuan tun dinhmunah Aizawl khaw chhungah ruahsur nasa avanga kawngpui ping a awm rih lo anti a, tukina Chanmari Ramhlun kawnga lung tla chu thenfai a ni tawh a, lirthei pawh dan pangngaiin a tlan leh thei tawh tih sawiin Zemabawk South Lungbial panna Berawtlang pan chhohna tukina min chu thenfai la ni lo mahse kawng dangah a hel theih tih an sawi a, tun dinhmunah Aizawl atanga Lengpui inkar kawng a tlang tha tih an sawi baw.

&lt;&gt;&lt;&gt;&lt;&gt;

FLORENCE NIGHTINGALE AWARD

Civil Hospital-a Nursing Officer Pi V. Lalmangaihi chuan waviin khan President Droupadi Murmu hnen atangin India rama Nurse chawimawina sang ber Florence Nightingale Award a dawng.

Wawiina he chawimawina hlanna inkhawm, Rashtrapati Bhavan, New Delhi a neih ah hian India ram state hrang hrang atangin Nurse hnathawk tha leh chawimawi tlak mi eng emaw zahte hnenah chawimawina hi hlan a ni.

Pi V.Lalmangaihi hi Aizawl Venghnuai ah a cheng mek a, a duty-na hmun leh hmun dangah theih tawp chhuahin dam lote nunna wavi tam tak alo chhan tawh a, Mizoram sorkar hnuaia a ICU hmasa ber Civil hospital Aizawlah din a nih khan, sulsutu leh tha leh zung seng tu niin ICU lama a thiamna a chhuanawm em em a, a manual siamtu zingah telin mi tlawmngai leh taima tak, mamawhtute tana eng lai pawha che chhuak thei zel mi a ni.

National Florence Nightingale Award hi Ministry of Health and Family Welfare, Government of India chuan kum 1973 khan nurse leh nursing professional-te'n khawtlang tana an rawngbawlna tha tak takte hriat rengna atan a din a ni. Mizoram chhunga thawk nurse mi 16 in he

chawimawina hi an dawng tawh a. Kumin a dawngtu Pi V Lalhmangaihi hi 17-na a ni a, Mizo nurse, state pawna thawk pahnihin an dawng tawh bawk a ni.

He chawimawina hi ramchhunga nurse chhuanawm tak takte hnena hlan thin a ni a, Damdawi in emaw, khawtlang emaw, zirna emaw, enkawlina hmun a hna thawk tha bik, nunna chhanchhuah leh hun khirh tak kara hriat reng tlaka thawk nurse-te tan ram pum huapin he chawimawina hi hlan thin a ni.

He chawimawina ah hian pawisa fai cheng sing 5 leh medal pek thin an ni. Mizoram sorkar chuan kumin atangin dan mumal tak siamin lawmpuina citation leh pawisa fai cheng sing 5 a hlan bawk ang.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.

<><><>

#### BAL VIVAH MukT BHARAT

Ram pum huapa kum tling lo inneihna tibo tura beihpui thlakna-National Campaign "Bal Vivah MukT Bharat" (Child Marriage Free India) chu Mizoramah pawh kalpui mek a ni.

Akashvani zawhna chhangin, Women and Child Development Deputy Director (ICDS) Pi Sailopari chuan kum tling lo inneihna tibo tura beihpui thlakna hi nikum atang khan Mizoramah an kalpui a ti a, district tina an staff te hnenah training an pe tawh a, Child Marriage Prohibition Officer (CMPO) thenkhat te pawh training an pe tawh tih sawiin heng bakah hian khawtlangah mipuite hrilhhriat niin training an pe thin a ti a, Home Department te nena Special Juvenile Police Unit-a framework-ah child marriage dah tel turin hma an la mek tih sawiin hemi chungchang ngaihtuah tur hian thutkhawm thuai an tum tih a sawi bawk.

Nikum November ni 27 khan India ram puma naupang kum tling lo inneih tibo tura beihpui thlakna, National Campaign "Bal Vivah MukT Bharat" (Child Marriage Free India) chu New Delhi-a Vigyan Bhawan-ah Union Minister for Women and Child Development Pi Annpurna Devi chuan hawngin, kum tling lo inneih venna tur leh a that lohzia inzirtina atan te, kum tling lova nupui pasal nei an awm report siam nana hman tur online platform, 'Child Marriage Free Bharat' portal chu a tlangzarh nghal a. He hunah hian Mizoram atangin Child Marriage Prohibition Officer (CMPO) pali (Aizawl, Lunglei, Champhai leh Mamit) an tel a, tawnhriat inhrilh tawinna hunah Lunglei CMPO Pu C Lalnunfela chuan kal khawmte hmaah Lunglei District-a kum tling lova nupui pasal inneih tibo tura an hma lakna chungchang a sawi a ni.

<><><>

## AMC

Aizawl Municipal Corporation inthlan nakuma neih turah Hmeichhe tana seat ruat bik atan Ward No. 2, 4, 5, 11, 12 leh 17 te pawh a ni.

Nakkum, 2026-a Aizawl Municipal Corporation (AMC) inthlan tum 4-na neih tura Hmeichhe seat tur hi vawiin khan Aizawl DC Conference Hall-ah pawh a ni a. Mizoram State Election Commission huaihawta AMC Women Reserved Seats pawhnaah hian Election Commission of India (ECI)-in a pawmpui National leh State Recognized Political Party aiawh 2 theuh; Registered Unrecognized Political Party aiawh 2 theuh; MJA, MUP leh MPF aiawh 2 theuh leh Aizawl DC emaw a aiawh emaw te an tel a ni.

Ward 19 awmna AMC ah hian Ward 6 chu hmeichhe tana hauh a ni a, AMC Term 3-na kal mekah hian Ward No. 8, 10, 14, 16 leh 19 te chu Reserved Seat a ni mek a ni.

<><><>